



Amaran!

Pihak Jabatan Agama Islam Perak tidak bertanggungjawab terhadap sebarang penambahan ayat selain kandungan khutbah yang dikeluarkan.

"SIFAT-SIFAT PEKERJA MUKMIN"

1 Mei 2026 / 13 Zulkaedah 1447

الْحَمْدُ لِلَّهِ¹ الْوَاحِدِ الْأَحَدِ، الْفَرْدِ الصَّمَدِ، الَّذِي لَمْ يَلِدْ وَلَمْ يُولَدْ، وَلَمْ يَكُنْ لَهُ كُفُوًا أَحَدٌ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ
وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا
بَعْدُ، يَا عِبَادَ اللَّهِ! اتَّقُوا³ اللَّهَ أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

Jemaah yang dirahmati Illahi

Marilah kita tingkatkan ketakwaan ke hadrat Allah SWT dengan melaksanakan segala perintah dan meninggalkan semua larangan Nya, mengikhlaskan setiap amal, semoga kita dilimpahi taufik dan hidayah, diperkukuhkan iman mengabdikan diri semata-mata kepada Allah Yang Maha Esa. Bersempena sambutan Hari Pekerja, mimbar akan menyampaikan khutbah bertajuk:

"SIFAT-SIFAT PEKERJA MUKMIN"

Firman Allah SWT:

﴿قَالَتْ إِحَدُهُمَا يَا تَابِتِ اسْتَجِرْهُ إِنَّ خَيْرَ مَنِ اسْتَجَرْتَ الْقَوِيُّ الْأَمِينُ ﴿٢٦﴾﴾

Bermaksud: "Salah seorang daripada kedua-dua perempuan itu berkata, "Wahai ayah ku, jadikanlah dia (Musa AS) sebagai pekerja (kita), sesungguhnya orang yang paling baik yang ayah ambil sebagai pekerja ialah orang yang kuat lagi amanah".
(Surah al-Qasas ayat 26)

Hari Pekerja, disambut pada 1hb. Mei setiap tahun, berakar umbi daripada perjuangan gerakan pekerja abad ke-19 di Amerika Syarikat, untuk menuntut waktu kerja lapan jam sehari, yang memuncak dengan mogok pada 1hb. Mei tahun 1886. Hari Pekerja memperingati perpaduan pekerja sedunia.

¹ Memuji Allah SWT

² Selawat ke atas Nabi Muhammad SAW

³ Pesan Taqwa



Di Malaysia, kerajaan sejak tahun 1972, memberi pengiktirafan kepada para pekerja dengan mengisytiharkan cuti umum pada tarikh 1hb. Mei.

Bekerja, mencari rezeki untuk menyara kehidupan bagi maksud mencapai kesempurnaan dan kesejahteraan hidup, adalah ikhtiar yang dituntut oleh agama ke atas setiap mukmin. Islam mengiktiraf pekerjaan sebagai ibadah jika dilakukan dengan niat mengharap keredaan Ilahi. Sekaligus kerja dilakukan demi menyempurnakan amanah dan menunaikan tanggungjawab seperti yang terkandung dalam ayat 26 surah al-Qasas yang khatib bacakan pada awal khutbah.

Rasulullah SAW menjanjikan kelebihan yang besar disediakan buat mukmin yang rajin bekerja semata-mata ingin menyempurnakan amanah selaras dengan sabda Rasulullah SAW:

مَنْ طَلَبَ الدُّنْيَا حَلَالًا اسْتِغْفَا عَنِ الْمَسْأَلَةِ ، وَسَعِيَ عَلَى أَهْلِهِ ، وَتَعَطَّفًا عَلَى
جَارِهِ ، جَاءَ يَوْمَ الْقِيَامَةِ وَوَجْهُهُ كَالْقَمَرِ لَيْلَةَ الْبَدْرِ

Bermaksud; "Barang siapa mencari rezeki halal untuk menjaga diri daripada meminta-minta, menanggung kehidupan keluarganya serta dapat membantu tetangganya, nescaya dia akan datang pada hari kiamat dengan wajahnya yang berseri-seri seperti bulan purnama". (Hadis Riwayat al-Tabarani)

Jemaah yang dilimpahi keberkatan rezeki;

Islam memandang mulia kepada setiap pekerjaan yang halal dan tidak melanggar syarak; pekerjaan yang membawa kepada kebaikan serta memberi keselesaan kepada kehidupan alam. Pekerjaan yang paling baik adalah usaha seseorang dengan tangannya sendiri, menjauhi perkara yang haram dan syubhah. Bekerja bukan sekadar mencari nafkah, tetapi merupakan satu bentuk ibadah dan ladang pahala. Islam menekankan bekerja untuk menanggung diri dan keluarga merupakan satu tuntutan agama, bahkan dianggap jihad fisabilillah. Islam tidak melihat kemuliaan seseorang pada jenis pekerjaan, sebaliknya pada kejujuran dalam melaksanakan tanggungjawab yang diamanahkan.



Dalam memenuhi tanggungjawab yang diamanahkan, para pekerja diuji dengan pelbagai dugaan dan cabaran. Namun, sebagai orang yang beriman, kita wajib bersabar dan terus berusaha. Firman Allah SWT:

وَتَبْلُوكُمْ بِالشَّرِّ وَالْخَيْرِ فِتْنَةً

Maksudnya: Dan Kami menguji kamu dengan kesusahan dan kesenangan sebagai satu ujian. (Surah al Anbiya' ayat 35)

Dalam menghadapi dugaan dan cabaran, setiap pekerja mukmin akan memandang kerja sebagai ibadah, memenuhi tuntutan menyempurnakan tugas-tugas fardu kifayah, demi mendapat keredaan Ilahi. Lapan sifat utama pekerja yang mukmin ialah:

Pertama: Beramanah dan berintegriti; melaksanakan tugas dengan ikhlas, jujur dan bertanggungjawab tanpa perlu diawasi; menginsafi sumber-sumber kewangan, peralatan dan harta di tempat kerja perlu diuruskan dengan penuh amanah, melalui amalan berjimat cermat, tidak membazir dan berbelanja secara berhemah. Tidak melakukan rasuah, tidak menyalahgunakan jawatan dan kuasa untuk kepentingan peribadi, keluarga serta kroni dan tidak melakukan pecah amanah.

Kedua: *Itqan*; melaksanakan tugas dengan khusyuk, tekun dan bersungguh-sungguh, hingga berjaya menghasilkan kerja yang bermutu.

Ketiga: Proaktif dan berinisiatif; senantiasa bergerak cergas, merintis daya usaha mencari ruang untuk meningkatkan mutu kerja dan hasil kerja tanpa menantikan arahan.

Keempat: Berakhlak mulia; mengamalkan etika kerja yang bersopan lagi tertib, di samping menjaga hubungan baik dengan rakan sekerja, orang atasan dan bawahan, majikan dan pelanggan yang memerlukan perkhidmatannya.

Kelima: Disiplin menjaga masa, menepati waktu bekerja, serta menunaikan janji dan memenuhi kontrak.



Keenam: Gigih dan berdedikasi; tidak mudah putus asa, memberikan tumpuan dan mengabdikan diri sepenuhnya untuk menyelesaikan tanggungjawab yang ditugaskan serta masalah yang dihadapi.

Ketujuh: Bersifat profesional; dengan ikhtiar berterusan menguasai dan menambah ilmu, pengetahuan, pengalaman, kemahiran dan kepakaran dalam bidang yang ditugaskan serta berusaha seboleh-bolehnya untuk tidak melakukan kesilapan.

Kelapan: Kerja ditafsirkan sebagai ibadah dan jihad yang disempurnakan bersama perwujudan iman, bertawakal dan berniat dilakukan semata-mata kerana Allah SWT, ibarat burung yang keluar pagi mencari rezeki dan pulang pada waktu petang. Setiap usaha yang dirintis dilengkapi dengan doa memohon petunjuk, panduan dan pertolongan ILAHI; senantiasa pula melafazkan kalimah kesyukuran berterima kasih kepada Allah SWT atas setiap nikmat kejayaan.

Jemaah Rahimakumullah

Pekerja mukmin wajib mempamerkan budaya kerja cemerlang, semoga diterima oleh Allah SWT sebagai amal makruf, yang mendapat nikmat keberkatan ketika di dunia, serta dilimpahi ganjaran pahala sebagai bekalan akhirat. Pekerja mukmin wajib mengamalkan sifat-sifat kesetiaan kepada majikan, dan semangat setia kawan serta saling membantu sesama rakan sekerja. Pekerja mukmin hendaklah memiliki keteguhan iman dan keberanian menegakkan yang makruf dan mencegah yang mungkar semasa memenuhi amanah dan menyempurnakan tanggungjawab di tempat bekerja.

Mimbar menyeru seluruh warga kerja agar terus menabur bakti, berkhidmat untuk agama bangsa dan negara. Didoakan semua warga kerja dikurniakan kekuatan dan kesihatan, berjaya memenuhi amanah serta menyempurnakan tanggungjawab dengan tekun dan bersungguh.



بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁴ حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ⁵ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، يَا عِبَادَ اللَّهِ! اتَّقُوا اللَّهَ⁶ وَكُونُوا مَعَ الصَّادِقِينَ.

Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin, serta para ulama yang muktabar meliputi aliran *Asya'irah* dan *Maturidiyyah*. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁷
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ⁸، وَأَصْلِحْ ذَاتَ بَيْنِهِمْ وَأَلْفَ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.

⁴ Memuji Allah

⁵ Selawat ke atas Nabi Muhammad SAW

⁶ Pesan Taqwa

⁷ Ayat Al-Quran

⁸ Doa untuk Kaum Muslimin



اللَّهُمَّ أَعِزِّ الْإِسْلَامَ وَالْمُسْلِمِينَ وَاَنْصُرْ إِخْوَانَنَا وَأَخَوَاتِنَا وَأَطْفَالَنَا فِي فَلَسْطِينَ، وَاحْفَظْ أَهْلَهَا وَاَنْصُرْ جُنُودَهَا وَدَمِّرْ أَعْدَائِكَ أَعْدَاءَ الدِّينِ يَا رَبَّ الْعَالَمِينَ.

Ya Allah Ya Rabbal ‘Alamin, kurniai kami keberkatan, pada rezeki yang Engkau kurniakan. Bimbing kami agar sentiasa bersifat amanah, tekun, jujur dan ikhlas bekerja kerana Mu. Bimbing kami agar dapat menyempurnakan kerja yang diamanahkan, lindungi kami daripada ditimpa sebarang musibah dan kemalangan dalam perjalanan dan semasa kami bekerja mencari nafkah yang halal. Kurniai pemimpin dan warga kerja kami sifat kesungguhan bekerja demi memajukan ummah dan negara.

Ya Mannan! Ya Razzaq!, berkatilah hamba Mu yang melaksanakan zakat, wakaf dan sedekah. Kurniai mereka rezeki berlipat ganda, sucikan harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

Ya Aziz! Ya Qahhar! Lindungi umat Islam yang sedang dizalimi serta ditindas oleh musuh-musuh Islam terutamanya umat Islam di Palestin dan Iran yang kini menjadi mangsa kezaliman rejim Zionis Israel, bersama Amerika Syarikat dan sekutu mereka; limpahi ihsan Mu membela dan mengurniakan kemenangan kepada hamba-hamba Mu di bumi Palestin dan Iran untuk dapat kembali hidup dalam suasana yang aman, selamat serta makmur.

Ya Mu'min! Ya Muhaimin! Jauhi kami daripada kemurkaan Mu; jauhi kami daripada termasuk dalam kalangan orang-orang yang terhalang mendapat nikmat Mu; jauhi kami daripada kesengsaraan, bencana dan malapetaka. Jauhi kami daripada kejahilan dan kezaliman. Limpahi rahmat Mu agar negara kami berada dalam keadaan selamat dan makmur, rakyatnya hidup dalam suasana aman dan muhibah.



Ya Maalikal Mulk!, Lantiklah untuk urusan kami, orang-orang yang terbaik dalam kalangan kami. Jangan Engkau lantik untuk urusan kami, orang-orang yang terburuk dalam kalangan kami. Hindari negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah lagi ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Muiz! Ya Adzhiim! Ya Kabiir!, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا إِنَّا فِي الدُّنْيَا حَسَنَةٌ وَفِي الآخِرَةِ حَسَنَةٌ وَقِنَا عَذَابَ النَّارِ
عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَىٰ
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.